

十具臉孔

崔家祺

角色：

賈樂顏，小丑甲，小丑乙，豬演員，羊演員，人事部署理助理副經理，大老細，助手，四姑媽，三表弟，八表弟，神秘小孩，中五畢業生，遊人甲，遊人乙，遊人丙，遊人丁，遊人戊，若干其他遊人

場景：

把舞台分為二份之一，右手面是員工休息室，內放衣物，鏡子，椅子，茶水化妝品等。左手面是表演空地，放長椅，花盆，垃圾箱等。中間是一道分半用的門。

第一幕

(幕開，燈亮，五光十色地變幻著)

(音樂起，巴哈的肯肯舞曲)

(所有小丑演員和動物演員入，在台前愉快地起舞)

(手握手圍圓旋轉)

(一字排開，肯肯舞跳)

(演員向觀眾揮手)

(眾遊人入，加入表演)

(眾人再次手握手圍圓旋轉)

(音樂完，眾人向觀眾致謝)

(燈暗，眾遊人及動物演員出)

(小丑們回員工休息室)

(燈亮)

(眾人疲倦狀，賈樂顏坐著睡覺，小丑甲在抹汗，小丑乙在喝水)

(副經理突然衝門而入)

副經理：有無攞錯呀 !!

(眾小丑大驚，賈樂顏驚醒站了起來，小丑甲掉了紙巾，小丑乙跌了水杯且咳嗽著)

副經理：你地係咪黎搵食架 !? 定係食左野黎 ? 安眠藥定鎮定劑呀 ? 頭先果 D 叫表演 ? 無氣無力咁款，係到 "un" 兩野就當跳舞，我都識啦 !! 請你黎做咩 ? 請你黎 "un" 架 !?(指著小丑甲) 你呀，走位走到錯晒，走埋落台呀笨 ! (指著小丑乙) 叫左你隻手大力 D 快 D 架啦 ! 指引話每秒二十次，你就兩次。(指著賈樂顏) 你就係都唔識笑，係咁依露隻牙出黎就叫笑 ? 死左人咩 ! 你話你地係咪黎搵食架 !?(刻薄大罵)(眾小丑站著低下頭)

小丑甲：我 ... 無 ... (細聲)

副經理：連你都話無樣野做得好呢 ? 咁得啦 ! 聽日要進行特別訓練 ! 由我親自做導師，教你地點樣出黎表演。當然啦 ! 唔當係工作時間，聽日早兩個鍾返黎報到，如果遲到就當係遲到一次，清唔清楚 ?

眾小丑：吓 ~? 唔清楚 ...

副經理：咩話 ?

小丑甲乙：吓 ~? 好清楚 !

小丑乙：(用手肘輕碰賈樂顏) 喂你出句聲啦，唔係齊齊咩書包上學去架啦。

賈樂顏：你又唔出 ? 淨係識話好清楚。(細聲)

(賈樂顏抬起頭看了副經理一眼，又垂低了頭)

副經理：無問題啦嗎？

賈樂顏：無

(副經理白了眾人一眼)

副經理：離晒譜架 ...

(開門離去)

(副經理出，燈暗)

(燈亮)

(員工休息室內，小丑甲乙已在準備)

(賈樂顏入)

賈樂顏：早晨

小丑甲乙：早晨

賈樂顏：佢黎左未？

小丑乙：放心，仲未，但我諗都差唔多架啦。

小丑甲：我今日足足訓少兩個鍾，依家都未醒晒，個所謂副經理無腦架 ...

呀，唔岩，佢個位叫人事部署理助理副經理，離總副經理呢個位仲好遠，對住 D 高層就笑騎騎，扮晒野，對住我地就發顛咁吠，佢扮小丑仲似過我地啦，我都無佢咁叻，抵我今日上佢堂學下野架！

(副經理突然衝門而入)

(小丑甲立即轉身對著鏡子假作化妝)

副經理：返齊啦嗎？咁可以開始今日既特別訓練，全部起身！

(眾小丑站起，一字排開)

副經理：身為我地樂園既專業小丑，對角色扮演既技巧要有一定掌握，但係你地近來既表現令人十分失望，為針對呢一點，我要加強訓練，依家我講一樣野出黎，你地就要同我扮，扮得唔似就再扮！好！你先！(指著小丑甲) 出黎做示範！

小丑甲：吓？唔好啦！

副經理：快D啦晒時間！成個小學生咁。嘖，賈樂顏你黎！

賈樂顏：係... 經理。

(賈樂顏向前踏出一步)

副經理：你扮... 扮咩好呢... 唔... 就扮鬼啦！

賈樂顏：鬼... 咩鬼？係中式定西式？

副經理：..... 日式丫！(不奈煩)

賈樂顏：吓？日式？...(思考)

(賈樂顏舉起雙手成三角狀，伸出舌頸，單腳跳來跳去)

副經理：我想問你做緊咩？(不滿)

賈樂顏：日式呀嗎！傳統妖怪單眼獨腳遮。

副經理：... 估唔到我地D員工質數係咁高... 話左你地唔得架啦！到返你開始先！(指著小丑甲) 佢做左啦，你無藉口唔做啦！

小丑甲：哦...

(賈樂顏往後企回原位，小丑甲向前踏出一步)

副經理：開始啦，簡簡單單，噃 扮董伯伯黎睇下先啦！

小丑甲：知道經理 八萬五呢個政策已經唔存在。(語重心長)

副經理：又係呢句 ... 算啦，咁扮下長毛啦。

小丑甲：打倒董伯伯！董伯伯落台！(激動)

副經理：噃 ... 咁 ... 咁林過雲呢？

小丑甲：(面有難色)(思考中)..... 嘿嘿嘿 (奸笑，手持利刀狀)

副經理：歐陽炳強呢？

小丑甲：(再有難色)(思考中)..... 嘿嘿嘿 (相同的奸笑，相同的手持利刀狀)

副經理：我想問同林過雲有咩分別？(不滿)

小丑甲：頭先歐陽炳強笑得無咁變態囉！

(賈樂顏，小丑乙掩咀偷笑)

副經理：我覺得一樣咋喎！咁既演技就黎撈？請歐陽炳強黎攞氣氛好過啦！(刻薄)(轉望小丑乙)笑笑笑！咁鍾意笑！好！到你！(小丑乙立刻收起笑容)你扮隻貓黎睇下！

(小丑甲往後企回原位，小丑乙向前踏出一步)

小丑乙：知道經理 喵~(咪眼式笑，右手握拳L型舉起，貌似招財貓)

副經理：(噁心)夠啦！扮狗啦！

(小丑乙作狗吠聲)(四處嗅東西)

副經理：唔錯丫！猩猩呢！

小丑乙：吼 ~ (左右手交替鎚心口)

副經理：怕羞既猩猩呢！

小丑乙：嗯 (面有難色) (無奈)

副經理：諗？要諗架咩？要諗即係唔掂啦！唔掂即係唔合格！到你！（指著賈樂顏）你再黎過！拿拿聲出黎！（小丑乙往後企回原位，賈樂顏向前踏出一步）你 ... 就扮凳啦！

賈樂顏：哦！（坐無影凳）

副經理：... 一 D 都唔似，扮檯！

賈樂顏：（心有不甘）係 ...（在地上用四肢支撐著身體，動也不動，一會兒後站起身）

副經理：床呢？

賈樂顏：（沉思半响）知道 ...（相同動作，一會兒後起身）

副經理：呢個係床定係檯？

賈樂顏：床。

副經理：扮多次檯黎睇下！

賈樂顏：係！（相同動作，一會兒後起身）

副經理：咁床呢？

賈樂顏：係！（相同動作，不要站起身）

副經理：你死架？昆我？有咩分別？（怒，踢賈樂顏，賈樂顏往側倒下後慌忙站起）你地全部都唔掂！係咪唔想係到做落去！（賈樂顏微微點頭，又搖搖頭）我講過扮得唔似要扮到似為止！而家到小組訓練！唔使旨意停！

小丑乙：（無奈）小組訓練？

副經理：係！我講你地扮！聽住啦！（指著小丑甲）林過雲用刀挾持住（指著小丑乙）怕羞既猩猩走到房裡面既……（指著賈樂顏）……

（大老細和助手入）

（助手緊貼在大老細身後，兩人進入室內）

（副經理望見大老細，立即轉為表現親切的笑容）

眾人：大老細您好。（鞠躬）

大老細：嗯

副經理：大老細大駕光臨員工休息室，一定係想鼓勵前線員工啦，你坐坐先。（大老細坐）唔使擔心，我地就算做到心力交瘁，力不從心，有心無力，我地都會盡心盡力咁為公司賣命架！

大老細：嗯，得啦得啦，我今日黎，係睇下呢到有無D咩地方可以減減佢，減少D支出既。你知啦，近排遊客少左，收入當然就……（擔憂）（轉望助手）你去周圍睇下D野啦，如非必要既就減啦！（助手點頭，在房內走動作檢查狀）

副經理：一定係呢班垃圾做得唔好！（指著眾小丑）所以我醒，做緊特別訓練，睇下可唔可以提升佢地既水平！依家我地仲訓練緊，試唔試下做導師玩下？以大老細既指揮才能，一定可以大幅提升呢班人原來既演出水平架！（眾小丑面有難色，不願意）

大老細：係？我攞唔攞得掂架？

副經理：當然掂啦，我地已經準備好啦！

大老細：真係得？

副經理：得！

大老細：真係？

副經理：係！

大老細：好啦！咁你準備啦！

副經理：(驚訝，面有難色，後強顏歡笑) 哦 ...

大老細：咁 扮狗先啦！

(副經理作狗吠聲)(四處嗅東西)

(大老細隨手把東西一拋，副經理含著回到他的前面)

(眾小丑和助手偷笑)

大老細：哈哈！好，好！(拍掌) 真係似啦！今次扮下死物！扮張檯啦！

副經理：知道老細！(笑)(在地上用四肢支撐著身體，動也不動，也不會站起身停止)

大老細：好啦，夠啦夠啦！再黎多一次，今次難D既，就係扮雨夜屠夫，林過雲！

副經理：吓 ... ? 林 ... 過雲？ 嗯 (反覆思量) 無問題無問題！
(笑) 嘿嘿嘿 (奸笑，手持利刀狀) 小姐，係咪搭的士呀 咁大雨 想去邊呀 (陰森)

(助手檢查完畢，走近大老細)

大老細：(莫視副經理，詢問助手) 點樣？查好未？(助手點頭) 好 ... 好 ... 返去寫個報告比我，呀！(望望副經理) 你地繼續努力，比心機為公司做野啦！

(大老細，助手出)

副經理：(笑) 係係，再見！(變臉，責備一眾小丑) 一個二個死架？你

地係咪傻架？見到大老細個個唔識笑咁！一碌木咁企晒係到！垃

圾！都唔知係咪黎返工架！（怒，沖門而出）

（眾小丑相望無言）

（燈暗）

第二幕

（幕開，燈亮）

（員工休息室外，賈樂顏在如常工作）

（賈樂顏表演著，若干遊客圍著他觀看）

賈樂顏：各位好，歡迎各位黎到我地既樂園，係呢到，大家會得到開心愉快既一天，我地會為你帶黎歡樂！而我既工作就係……（扮失憶）……就係…… 嗯……

眾遊人：就係咩呀？

賈樂顏：唔記得左添……你地幫手估下啦，係咩呢……

遊人甲：扭波！

賈樂顏：唔係！

遊人乙：變魔術！

賈樂顏：唔係！

遊人丙：派紀念品！

賈樂顏：唔係呀嗎？咁睇小我？我點止識做呢D野呀！

遊人丁：重使問既？你既工作就梗係賺錢啦！

(賈樂顏沉默)

賈樂顏：哈！呢位人兄咁鬼現實架！希望你賺多 D 啦！我之前咪講左囉，我既工作咪就係為你地帶黎歡樂！

眾遊人：噓！(笑)

(四姑媽，三表弟，八表弟入)

(三表弟和八表弟大聲爭吵著，一家人走近賈樂顏)

賈樂顏：(驚訝，面向觀眾訴苦) 閉啦！係佢地一家？我係到做小丑？唔可以比佢地發現架！

遊人甲：咩呀？你同緊邊個講野？(疑惑)

賈樂顏：無 ... 無野，不如我講個故事你地聽啦！

(四姑媽，三表弟，八表弟入了人堆中)

眾遊人：好呀！

賈樂顏：(童話旁白腔) 係好奈好奈之前，一個只有佢地自己覺得愉快既小家庭入面，住左一家四口，女主人因為在家族中排第死，所以 D 家族小朋友就稱呼那對夫婦叫死姑丈同死姑媽。

遊人乙：死姑丈同死姑媽？

賈樂顏：無錯！佢地為人好自信，講野簡直充滿藝術氣質，談吐婉轉又可以直中要害嘞，可惜成日睇唔起人地啦，佢地有一對仔，因為係家族同輩中排第三同第八，所以叫三八表弟，佢地極度活潑，超級健談，真係好鬼死可愛架！

遊人乙：跟住呢？我知啦！跟住佢地展開冒險旅程？快 D 講快 D 講！

賈樂顏：跟住佢地就過住幸福美滿既生活啦！

眾遊人：噓！

(八表弟探頭而出，眾遊人讓位予四姑媽一家)

八表弟：咩死？咩三？咩八？

三表弟：死三八？死三八，死三八！

(眾遊人鄙視，眾遊人散，出)

(賈樂顏見眾人散去，欲承勢轉身而走)

四姑媽：喂！你！停係到！(賈樂顏停步，轉身露出親切的笑容) 頭先咁識攞氣氛，陪我兩個仔玩下先！

三表弟：媽咪！呢個小丑咁似樂顏表哥既？

八表弟：係呀係呀！好醜樣！

(賈樂顏露出更誇張的笑容，以防被他們認出)

四姑媽：點會呢！佢唔會咁傻走去扮小丑咁賤既！話晒都係我姪啦！(賈樂顏低頭不語，不是味兒) 喂喂！快D表演黎睇下！一碌木咁！(賈樂顏無奈，拿出一個氣球，慢慢吹漲) 都唔知呢到點請人架！D小丑選角咁鬼差，你睇下你睇下，型又唔夠型，醒又唔夠醒，咁樣衰，同我上次去美國果次真係差好遠！我終於知道依家點解得返咁少人黎香港啦！都係多得我地呢班所謂既旅遊業精英囉！

(賈樂顏愈吹愈急)

三表弟：咁呢個咪係精英囉？(手指賈樂顏) Hello！精英！哈哈！

八表弟：佢係精英黎架？原來精英即係小丑，我都要做精英，我要做小丑！

四姑媽：你痴左線呀？做小丑？諗你都唔好諗，講都唔好講呀！做小丑會好似佢咁樣衰，要一碌木咁企成日架！一陣比人地聽到你個衰仔咁樣講，我顏面何存！講過！要講都講一份正當職業！(不滿)

(賈樂顏愈吹愈急)

八表弟：哦！咁我第日唔要做小丑！做小丑無出色既！我要做醫生同律師！

三表弟：我要做科學家！拎諾貝爾獎！

四姑媽：好！好！你地有志氣，咁奈無見過你地樂顏表哥，話唔定佢真係做左小丑！咁就真係家門不幸啦！哈哈！

(賈樂顏壓爆了氣球)

兩表弟：嘩！

三表弟：嚇死人咩！

四姑媽：你有無攞錯呀！嚇親 D 細路點算！係咪你負責！係咪呀？吓！
(不滿) (賈樂顏深呼吸，露出親切的笑容)

賈樂顏：(高音，以防人認出)..... 唔好意思呀呢位太太！Hi！兩位可愛既小朋友！依家哥哥因為受到外星人攻擊，手上呢個重要既寶物因而被破壞左！不如你地幫我係樂園裡面尋找外星人軍團既行蹤啦！地球好需要你地保護架！快 D 走啦戰士們！.....

(眾人默然，鄙視他)

三表弟：..... 你自己去尋找啦白痴仔，當我地傻架？

八表弟：低能！自己吹爆左就係到作野！

四姑媽：佢係傻架！走啦走啦，唔好理呢 D 精英啦！

(四姑媽，三表弟，八表弟出)

(賈樂顏目送他們離開)

(賈樂顏進入員工休息室，坐在椅上休息)

(賈樂顏疲倦狀)

(副經理入)

(副經理手持信封進員工休息室)

副經理：賈樂顏，公司有野比你！快 D 黎攞！

(賈樂顏站起身)

賈樂顏：唔係大信封下嗎！(擔憂)

副經理：攞左咪知囉！我手軟啦！快 D 啦！都唔識撈既！(賈樂顏接過信封，拆開，閱讀狀) 噏！公司見你平時既表現都唔錯，都好努力做野，依家升你職，你個新位叫資深進階高級小丑，唔錯架啦！呢封信係知會下你架啫！

賈樂顏：下 ... 升職？太好啦！唔該你呀經理！

副經理：比心機做野呀！唔係你就知死！

賈樂顏：係，係！

(經理出)

(半晌，賈樂顏撕破信封，放入衣袋中)

(賈樂顏拿出紙碎看了看，又放入衣袋中)

(賈樂顏出)

(燈暗)

第三幕

(幕開，燈亮)

(員工休息室內，賈樂顏正在休息)

(賈樂顏在椅子上睡覺)

(豬演員戴上豬面具，虎面具。羊演員戴上羊面具，狼面具。一人兩層，豬面具和羊面具置於最外，掩蓋虎面具和狼面具)

(豬演員和羊演員入)

(他們都十分疲倦，步伐不穩地進入員工休息室，撲倒在地上坐著)

(賈樂顏驚醒)

賈樂顏： ... 喂你地點呀，有無事呀！

豬演員：呢個野密封架！(指指面部) 一 D 新鮮空氣都無！再做奈 D 真係會死人。

賈樂顏：我都知 ... 你地除低個面具休息下先啦！

(豬演員和羊演員面向觀眾，除下豬面具和羊面具，露出虎面具和狼面具)

賈樂顏：嘩，咁多個既？你唔係專扮豬(指豬演員)，你唔係專扮羊架咩？(指羊演員) 幾時扮埋虎同狼？

羊演員：你唔知咩？公司近排要縮減開支呀嗎！

(豬演員和羊演員除下虎面具和狼面具，呼氣)

賈樂顏：我都知！上次大老細先黎過。

羊演員：佢地要我地動物演員一人戴兩個面具，由扮一隻動物變成扮兩種動物，要同一時間戴，方便立即變身呀！好衰唔衰抽中左隻狼，我就真係變成

左被住羊皮的狼啦！

豬演員：係呀！簡直就做死人！無計啦，唔通唔做咩！唔同你呀！升左職，唔使驚無得做！

賈樂顏：咩呀！我先唔想做呀！..... 講笑啫 ... 係唔想無得做 ... 公司咁樣刻薄你地真係衰左 D，你地又唔出聲？

(眾人沉默半晌)

豬演員：唉，算啦，我地細個去遊樂場睇住 D 動物人行黎行去，唔單止唔覺佢地辛苦，仲以為好好玩添！依家就

羊演員：咪係！我以前去遊樂場都係咁！有次有個山羊人無啦啦走埋黎攞住我嗰，以為自己好得意，但係佢個身好鬼熱，所以唔想比佢攞！我亞爸亞媽係咁叫我同佢影相，已經話左唔制架啦，佢地係都話影返張，嗱！係咪衰呢！依家比佢同化埋，做左山羊人啦！話左唔影架啦！我要做醫生架嗎！

豬演員：超！我夠想做太空人啦！我依家個銀包就真係唔方唔太空啦，願望成真啦 Yeah！

賈樂顏：(興高采烈地加入) 咪係！我都唔想做小丑！(醒覺) 嗯 咳 ... 咳 ... (扮咳) 我話我真係做到唔想走 ...

豬演員：扮咩野丫賈樂顏！經理又唔係到！你唔想做平時都唔出聲啦！我地都明白既，為左份工，多一事不如少一事丫嗎！(看錶) 嘩！咁遲

啦？小息又完啦！要做野啦去。

(豬演員和羊演員站起，拿著面具離開)

(豬演員和羊演員出)

(賈樂顏走出員工休息室，到表現空地)

(若干遊人出，圍住賈樂顏)

(賈樂顏面露笑容 , 拿出幾張相片 , 向遊人展示)

賈樂顏 : 抽張啦抽張啦 ! 抽中咩野扮咩野 ! 哈哈 ! (遊人戍伸手去抽) 唔好咁難喎 ! 又唔好咁易喎 ! 難得黎易地就最好啦 !

(神秘小孩身穿著黑衫黑褲黑鞋)

(神秘小孩入 , 緩慢地走入人群)

(遊人戍把抽取的相片交給賈樂顏)

(賈樂顏默然 , 把相片放回袋中)

遊人戍 : 唔係唔識扮小丑呀嗎 ! 你自己咪係囉 !

(賈樂顏思考)

賈樂顏 : (賈樂顏展現笑容 , 拍手跳舞) Hi ! 你好 ! 我係快樂既小丑 !

(眾遊人稍散 , 讓位予神秘小孩 , 讓觀眾看見他)

(神秘小孩呆呆地望著賈樂顏)

(眾遊人散 , 出)

(賈樂顏望望他 , 望望觀眾 , 望望他 , 又望望觀眾)

(燈稍暗)

神秘小孩 : ... 你 ... 扮 ... 得唔似 (慢條斯理)

(賈樂顏沉默)

賈樂顏 : 歡迎你呀 ! 呢位小朋友

神秘小孩 : ... 你 ... 唔識扮 ... 小丑 (脆異)

賈樂顏：唔 係咩？

神秘小孩：... 你 ... 返屋企 ... 快D返屋企 ...

賈樂顏：吓 ... 返屋企？

神秘小孩：嗯

賈樂顏：我 ... 哥哥好叻架！陪你玩丫！抽張相，抽中咩野扮咩野。

(賈樂顏轉身摸摸袋中相片，尋找狀)

(神秘小孩轉身離去，出)

(燈回復正常)

(賈樂顏拿出相片，轉回身子)

賈樂顏：可以啦 唔見左既？唔通係 ...！(向觀眾作驚慌狀)

(賈樂顏默然，垂下頭，撕破手中相片)

(他散落相片碎在地上，垂下頭匆匆離開，出)

(燈暗)

第四幕

(幕開，燈亮)

(員工休息室內，賈樂顏匆忙地化著妝，小丑甲乙也在整理東西)

(副經理入，急步進入休息室內)

副經理：(拍手) 快手D！快手D！你地都知今日係月巡遊架啦！仲咁慢？快還快呀！千祈唔好出錯呀！今次月巡遊關乎公司形象架！

眾小丑：係！經理！

(副經理出)

(良久，電話聲)

(賈樂顏停手，拿出電話接聽)

賈樂顏：喂？咩事呀阿媽，好忙架我 咩話？今晚無飯食？你唔係無煮呀嗎！無煮飯，係咪煮左麵呀？..... 得啦得啦，我不騷都咁認真架啦 你今晚又扮病去探靚仔醫生？鬼馬啦你！計埋計埋今個月都第四次啦！係幾靚仔既 ~ 以前！見左咁奈，仲唔夠咩 但係難得今晚月巡遊早放，都食唔到你飯 得啦！好煩呀！我識照顧自己架啦！..... 我準備緊野呀，好啦，拜拜！

(賈樂顏收好電話，呆呆地望住鏡子中的自己)

小丑乙：做咩呀，無得食呀？攞掂埋今晚 D 野先算啦！

(賈樂顏醒覺)

賈樂顏：咩呀，你估我無得食呀？今晚攞掂 D 野一齊去食！(豪氣)

小丑乙：好！

(賈樂顏再次化著妝)

小丑乙：喂，賈樂顏你條眉紫菜咁粗既？畫到出晒界，退晒步啲！

賈樂顏：係 ... 係咩？

(燈暗)

(副經理入，進室內)

(燈亮)

副經理：(拍手) 五點啦！五點啦！準備好晒未呀？一睇就知未得啦！我拜託拜託你地幾位大爺好好睇睇黎呀！今晚唔衰得架！

(賈樂顏慢慢地走近經理，又停步，又走近經理，遲疑)

副經理：咩事呀，急屎呀？

賈樂顏：經理，其實有 D 野我想講好奈架啦，但唔知講唔講好 ...

副經理：做緊戲咩，呢句野 ... 十套戲出現左，有十一套最後都係要講架啦！講就講啦！多餘既！

賈樂顏：我 ...

副經理：嗯 (點頭)

賈樂顏：我 ... 我 ...

副經理：講啦！

賈樂顏：我其實

小丑甲：我其實好愛你架！(大聲)

賈樂顏：咪玩啦！經理，我其實想請假！

副經理：無問題丫，星期幾？咩事？

賈樂顏：其實 ... 係想依家，我想去一去

副經理：唔得！(堅決)

賈樂顏：經理，我知月巡遊好重要，但係 ... 你好似有後備人選啫 ... 今次可唔可以 ...

副經理：賈樂顏！(小丑甲乙停手觀看) 我一向都好睇重你！仲升左你職，唔好同我問埋晒 D 無可能既問題，依家呢個時候先黎話請假？所有野已經準備好晒，月巡遊就黎開始，演員依家先出唔到場，後果你比我清楚，唔單止

係你自己既問題，重係公司形象既問題，立即返去你崗位！（語氣強烈）

（賈樂顏低頭，無奈）

（副經理出）

（燈暗）

（豬演員和羊演員入）

（豬演員和羊演員戴上豬虎，羊狼面具，眾小丑戴上假髮）

（眾人在員工休息室門後排隊準備出場，排隊次序為豬演員，羊演員，小丑甲，小丑乙，最後是賈樂顏，各人身袋黑白色的紙碎準備，副經理在旁預備指揮）

（眾遊人入，在表演空地面朝員工休息室方向圍成半圓，成觀眾席）

（燈亮）

（肯肯舞曲起）

（眾遊人隨意拍掌）

（眾遊人有節奏地一起拍掌）

（良久，音樂停，眾遊人停手）

（副經理指了指，豬演員步出員工休息室）

（豬演員鞠躬）

（豬演員笑著跳舞）

豬演員：為財富，唔使估，左扮右扮好痛苦。

望照顧，望參扶，最好扮豬食老虎！（除去豬面具）

(豬演員拿出紙碎往天拋開)

眾遊人 : (歡樂) 嘩 ~ (拍掌)

(豬演員往後企)

(羊演員步出員工休息室)

(羊演員鞠躬)

(羊演員笑著跳舞)

羊演員 : 化晒妝 , 心荒荒 , 純潔天真本性喪 。

入左行 , 盡收藏 , 變成一隻羊皮狼 ! (除去羊面具)

(羊演員拿出紙碎往天拋開)

(眾遊人拍掌)

(羊演員往後企)

(小丑甲步出員工休息室)

(小丑甲鞠躬)

(小丑甲扮鬼臉)

小丑甲 : 呢到都係專業員工 ,

討好上頭萬事依從 ,

不問黑白係奸係忠 ,

唔同口面十幾廿重 ,

是非之心從此被封 ,

人生夢想就此相送！

(小丑甲拿出紙碎往天拋開)

(眾遊人拍掌)

(小丑甲往後企)

(小丑乙步出員工休息室)

(小丑乙鞠躬)

(小丑乙扮鬼臉)

小丑乙：樂園深處進進退退，

假樣假聲通通佔據，

真我理想遙遙之距，

唔識做人快快開除，

遊客職員來來去去，

日日用住唔同面具！大面具！

(小丑乙拿出紙碎往天拋開)

眾遊人：(歡樂) 嘩 ~ (拍掌) (歡呼)

(小丑乙往後企)

(燈暗)

(賈樂顏突然拿出手機慌忙接聽)

副經理：到你出去啦仲聽電話！一陣慢慢比你傾啦！

賈樂顏：(驚訝) 咩話？亞媽今次入左深切治療部？(呆了半晌) 細佬知道未？好！我即刻黎！(賈樂顏關上手機) 經理，一個表演要成二十分鐘，我趕唔切，我想 ...

副經理：出去！立即出去表演！

賈樂顏：唔得呀，我一定要 ...

副經理：無可能！賈樂顏我話你知唔好玩野！你係最後一個，拿拿聲做完，之後有事我放你幾日假，你平時唔係好聽我話架咩？

賈樂顏：(面向觀眾自白) 無錯我係好聽你話，以前！但係我今次唔走唔得。你本來都有後備人選架啦？仲要為難我？好似果個演技訓練班咁，又要扮嘍又要扮物，果D野跟本就無可能扮到，算啦！成日比人鬧到一面屁，都仲要笑笑口嘻嘻哈哈，都算啦！無計，因為我要保住個飯碗為兩餐 ... 其實我一早就唔應該忍，如果我對上三次有去醫院探我亞媽，我會知道佢病情有幾嚴重，佢今次有事，隨時可能再見唔返，咁你都唔比我走？吓？(激動)

(賈樂顏解開假髮，憤力往地上拋)

副經理：你公開表演走左去會影響全公司形象，你點負責，我點扮個樣同大老細交代！

(賈樂顏二話不說，衝出休息室大門)

(眾遊人見賈樂顏出現，歡呼拍掌)

(賈樂顏稍一停步，望了望遊人，再跑走)

(賈樂顏出)

(燈暗)

第五幕

(燈亮，幕開)

(小丑甲在空地表演著，一堆遊人圍著他觀看)

(副經理在休息室內按著計算機)

小丑甲：你地估下我最叻做咩？我最叻就係扮野啦！

(中五畢業生入)

(中五畢業生拿著公文袋匆忙地朝員工休息室走)

(小丑甲突然走近中五畢業生，學習他匆忙的步伐姿勢)

(中五畢業生急停，小丑甲急停，對望，畢業生起步，小丑甲起步)

眾遊人：哈哈！(拍手)

(中五畢業生望了望，又不理他們，在員工休息室門口敲著門)

副經理：入黎丫

(中五畢業生進)

中五畢業生：您好，呢到係咪岩岩有空缺？我係黎應徵既 ...

副經理：係呀，坐啦，(中五畢業生坐) 點解你想見呢份工？

中五畢業生：因為我期待小丑呢份工作，人地開心，自己又開心。

(燈暗)

完